

四庫全書

集部

欽定四庫全書

集部

清江三孔集卷二十一

詳校官中書臣張經田

助教臣常循覆勘

總校官知縣臣楊懋珩

校對官助教臣羅萬選

謄錄監生臣程學道

欽定四庫全書

清江三孔集卷二十

宋 孔平仲 撰

古詩

馬上詠落葉

敝敝林中葉落勢殊未休念汝春夏間
兀兀一何稠朝
煙坐蒼翠暮雨借膏油及今乃委地
只以藉馬牛焚之
揚其灰或用糞田疇當記排空出
結陰彌周周物生固

有數時去安可留况汝易擺觸性質本纖柔惟有松竹
秀獨當天地秋

使紙甚費

家貧何所費使紙如使水親交或見遺自買不知幾置
之几案間數軸俄空矣作字本不工學書非不喜不知
何故盡疑若有神鬼若云隨置郵性復懶賤啓問或強
為之皆出不得已橫斜若幡脚齟齬如鴈齒數易僅能
成紛紛多廢委致失輕重畏慎防觸抵往往已緘封

時時又刪洗遂令巾行謁大丰或緣此昔無楮先生云
自蔡倫始假令行竹簡禿野未供使人生有知慧不若
愚且鄙古來取卿相未必皆經史誰教識點畫空耗五
斗米咄嗟為此詩又是一張紙

謝王通叟回紋詩

北風吹波客棹折尋陽維舟不敢發觀君和我回紋詩
滿眼春光破冰雪山間玉少白石多造化積英費融結
如君藻思豈易得姓名盧駱推前列他人平步取卿相

乃獨區區困羈紲江湖漂泊隨斷梗歲月崢嶸逼華髮
頽然放肆孰可測一馬固能齊萬物胡琴雖已隔黃壤
寶燈吐欲高于月人生樂事君得多誰羨腰金擁幢節

送王通叟

潯陽江頭夜吹簫旁若無人聲正調問之誰何天鬻子
謫官東南數十里當時司馬泣琵琶君獨怡然奏宮徵
但能如此游世間于諸榮辱何憂喜

送朱君貺德安宰罷任還

潯陽五邑誰善政
歷陵令尹朱為姓
孜孜常以民存心
四境安娛吏無橫
吾愛其人頗真率
笑語詎諧喜譏評
山有猛虎藜藿長
人得朋友衣冠正
當時文學推第一
濶步青雲乃蹊徑
大賢百里固非地
赤子三年且無病
如君才智可自達
今歸朝廷惟所應
君臣昔以譬墟荒
吉甫文武陛下聖
當陳半策縮萬金
翩翩六翮凌風勁
江邊鍾官老鑄錢
坐髀已消窮且暝
倘君富貴不通書
當驗行藏素非佞

用常甫元韻寄彭澤曾移忠

清秋古邑氣象開健令叟組從南來淵明已往狄公死
繼有賢者荒山隈九江安流息駭浪百里和氣迎新雷
積年通事一朝決落筆翩翩何快哉幽潛曲折皆照見
正以寶鑑懸高臺古稱豈弟民父母君視百姓猶嬰孩
近來俗吏狃文法往往習尚以利回惟君用心知自性
造次所發皆矜哀政成訟簡當暇日間或吟詩持酒盃
言辭泠泠韻不俗識子眉宇無纖埃長篇示我已踰月

詩債甚久煩君催我如荒田廢畊墾嘉穀不植歲且灾
為君鉏頑掘枯槁滿把所收惟草萊金山萬丈絕梯級
手聚沙礫空成堆龍鱗難攀徒自苦狗尾強續良可咍
想君風采方引領忽見沂浪停高梳迎門倒履喜如沃
相與一咲傾新醅曹亭孤峙眺回遠杖策共尋幽磴苔
諸峯積雪倚天白此處誦唱須清才老雞爪觜未易犯
斂翅避子甘低徊

送周元翁赴省試

靜如秋潭月秀比玉山岑瀟溪素積善遺澤乃在今一
鳴先衆人再鳴慰我心茁芽舊固好浚養日愈深歲暮
冰雪氣闕山車馬音去者轍相結豈止旅思侵期君賈
餘勇泉俊將成禽策功居第一受賞綰千金高堂遲捷
布華髮正盈簪

因讀黃魯直所與周沆曾詩詩與字俱好以此寄
之

魯直之文如電折霜開魯直之書如雨行冰散駸駸步

驟日加遠與子三年不相見庭柯未長一尺圍起視孤
標挿星漢昨朝誦子所作詩使我自失長嗟嘆我衰力
薄空辛勤直欲為子焚筆研此才不使重臺閣四十青
衫尚為縣南山積雪玉倚空高亭壓城天北風安得與
子跨飛鴻與我共哦清景中銷金紆紫世不空豪傑卓
犖豈易逢願言與子長相從四方上下為雲龍

寄子由

晨興悲風鳴霜霰集我屋忽驚歲云晚日月疾轉轂穴

蟲知天時閉戶各潛伏而我亦勞止擾擾尚馳逐宵征
戴星明暮飯多見燭灰塵彫鬚眉銅臭蝕肌肉念當投
劾去牽繫五斗粟豈無數畝田亦有千箇竹平生羨為
農水旱憂不足空效烏雀飢唧啾如聚哭內顧復遲回
行藏類祗觸長卿著犢鼻揚子投天祿岷峨能生賢獨
不主為福如君乃栖栖似我宜碌碌連山積雪壯霽色
明群玉對此想清標凜然疑在目安得兩翅長高峯逐
黃鵠飛去墮君前綢繆論心曲

元豐四年十二月大雪郡侯送酒

平明大雪風怒嗥屋上卷來亭下高更深更密皆能到
所在紛紛如雨毛堆床壓案埽復聚取筆欲書冰折毫
鬚眉沾白催我老自頸以下類擁袍此時只好閉門坐
右手把酒左持螯奈何嶢岼據聽事千兵踏藉泥如糟
強登曾亭要望遠紙傘掣手不可操黑陰遮眼鋪水墨
寒氣刮耳投兵刀飢腸及午尚未飯更搜詩句無乃勞
幸有使君憐寂寞亟使兵厨分凍醪余雖不飲為一醕

兩頰生春紅勝桃
醉眼膏騰視天地
螺贏螟蛉輕二豪
勿令小暖氣便壯
自笑世間皆我曾

寄常甫

北風三日雪南湖
一尺冰晚雲遮望
眼不見玉山城

宵興

我眠何由安擊鼓
中夜起出門若秉
燭月色照千里屋
瓦微有光紛紛雪
正委清寒薄駝裘
六合氣如水既歸
整燈火危坐閱書
史羸僮拭眼睫侍
我色不喜問之強

應對固以喋口齒金壺澁水漸城上更屢死戍兵飽且
昏汗漫睡方美援桴雖賤事其定關衆耳柰何司晨夕
倒錯一至此惟有赤憤雞喞喞鳴不已

十二月二十五日大雪

前時大雪風擾之有無厚薄皆不齊今朝大雪無風色
下隰高原摠盈尺由來此物本陰氣偏近黃昏落尤劇
斜縈碎委百千態不是天上誰做得錚錚鳴霰已三日
厭坐北窻聞滴歷自非猛下意不醒半夜一天星斗白

漫漫玉琢人世界蹂踐成泥真可惜呼童梯屋器貯之
猶得煎茶待嘉客

城東作

九江雖僑寓城東乃松楸泉府固勞冗十日得一休朝
出暮可還駕言循故丘雨洗川原淨鳥啼岩谷幽白楊
吟悲風澗水咽長流江西走濁浪中有蛟鼉游可望不
可涉裴徊倚山陬耽耽林間鳴歲老爪如鈎飛下啄餘
祭肉食惟自謀

詠道上松

長松高落落積雪白皚皚鱗鬣凍且僵鬱結久不開觀
其纏壓意直使同枯菱雁帶寒光去鳥傳春信來微陽
入直幹生意忽已回豁若醉初醒整頓出塵埃秀色媚
山腹孤標摩斗魁時至自當復安得長摧頽若非根本
壯何能異草萊

狂犬

吾家有狂犬其走如脫兔撐突盤盂翻搜爬堂廡汗逢

人吠不止鷄噪猫且怒固難在家庭只可守村墅不見
已半年意謂少懲懼昨日至城東搖尾喜若赴銜衣復
抱膝屢叱不宥去一躍數尺高其強乃如故豈惟性則
然汝分亦天賦未聞有驛騶蹄嚙棄中路安敢携汝歸
重令兒女怖

子明碁戰兩敗輸張寓墨并蒙見許夏間出篋中
所藏以相示詩索所負且堅元約

平生性好墨以此為晝夜陳玄爾何為能使我心化四

方購殊品十倍酬善價江南號第一易水乃其亞古錦
綴為囊香羅裁作帕精粗校白黑情偽攷真詐欣然趣
自得其樂勝書畫英英清河公風格繼王謝語舊則鄉
邦論親乃姻婭前時偶休澣亟之城南舍所嗜與我同
奇蓄乃自詫奕秋約籌局張寓賭龍麝貪多而務得廉
遜或不暇鈎刀試一割駕足効十駕決勝有如兵必爭
還似射黑雲半離披玉馬恣踪藉初鳴已驚人再鼓遂
定霸物情矜俊捷天幸蒙假借功成不自高垂首甘藜

罵

子明每甚
敗語則褻

但當償所負然諾重嵩華彎弓既有獲豈

不顧鴟炙滌硯埃見臨倒屣出相迂陵尊且犯貴此罪
在不赦更許觀篋中前期指朱夏

再寄子由

湓城趨高安相望若隣屋思君腸九迴終夕轉車轂一
從江上別再見臘與伏宮堯阻躋攀疲曳愧躡逐此心
敢忘德炯炯如寸燭念昔見教勤綢繆均骨肉及今無
所成長大惟食粟讀君黃樓賦溢耳感絲竹蹈海始知

深秋水暫自足斯文道中喪吊古堪慟哭勃興得公家
萬物困陵觸聲名載不朽豈羨卿相祿琢瑯窮乃工未
剝不為復嗟予空有心資性本碌碌佳篇屢寄酬珍賜
比金玉隋珠照十乘只報一魚目反顧拙丹青何由希
畫鵠黃華強再奏取笑陽春曲

久雨

涉春寒未衰若雨天欲破所向泥沒膝閉戶祇悲卧雲
如傍檻飛風若吹瓦墮群陰無際涯翕翕相唱和草木

出隨陽生意固已挫蛟龍舞波豪鳥雀噪枝情陂池尚
未完時節不可過殘租待晴輸新種須暖播露霖何時
已天意亦誰柰窮巷爾何為悲吟追楚些

寒食郊外

淅淅雨沉城浩浩泥沒轍四山氣如蒸萬里天欲雪我
時出郊垌山徑屢曲折雖懷顛沛憂亦有觀覽悅幽花
媚林薄粲粲生意發紅紫相後先各自有時節長松困
冰雪顛悴終不屈及今翠天矯騰拔見筋骨陰陽有代

謝物性安可奪請視大塊中紛紛盡亮未興衰若鱗次
今古猶市閱只此悔與晴變態亦俄忽歸路日已煬披
襟滌初熱

余比見管勾太平觀劉朝奉見嫵太盛教以一食
之洽自用有效因以告子由且進先者後欲之
說蒙示長篇竊服高致謹再用元韻和寄

廬山九江南勝隱類王屋中有劉先生逃榮棄朱轂我
嘗問持養次第蒙攝伏操心要常存尤戒忌追逐教人

啖火棗喻世指風燭一從屏晚膳已覺失頤肉諒能早
如此盜自有餘粟寢甘無復夢行健不須竹萃地涌清
波漱飲每充足當使百靈朝如聞九蟲哭欲塵亦遂掃
由味方有觸甘肥自煎熬其毒甚回祿願公亦澹薄同
享秀眉福丈夫貴決烈安得猶碌碌淘沙始見金椎石
方逢玉所以老氏言為腹不為目未能便仙去輕舉隨
白鶴且保臨老年眼明腰不曲

送徐德古

魚蝦爭後先波浪拂西北今朝卧龍起且與收風色

常甫招客望海亭

蓬萊釀酒酒已成賀家池上新採菱紫衣侍立烏帽走
吾兄招客望海亭歸來為我道客語

闕

醉中遙指北山下云此白處乃海浦入山迤邐數百山
客居乃在一山顛雖非陽侯所窟宅風濤瀕洞已拍天
餘山亦有人雜居山無桑麻只捕魚海中百怪所會聚
海馬海人并海驢或如七十之老翁或如三尺之侏儒

手足口眼莫不見鞭磔盡作人號呼千艘競造石首脯
雨聲颯颯魚來初截波一網十萬尾棹歌喜噪翻蓬壺
垂釣忽挂綠鸚鵡探石仍得真珊瑚晚晴蜃結彩霞閣
夜黑龍呈明月珠紅漣紫液碧湫澗頃刻變態世所無
我聞此景若在眼便欲駕舶尋天吳昔時管寧亦避地
吾祖嘆息思乘桴我今何為不可達誰能俛首甘區區
平時此亭景最美自謂清曠更無比一聞客語心坐馳
却上望海汗潢耳嗟哉好惡隨所遷世間萬事多如此

官松

我行九江南曠野圍空山道旁何所有高松立噴岼藏
標隱雲霧秀氣凌岡巒橫騫却與走怪狀千萬端中有
清風發能令朱夏寒流金五六月方苦行路難騎者欲
顛沛負者面如丹氣息幾斷絕至此方少寬消渴飲甘
露涸轍投長瀾迺知古人意為惠無窮年亦有被剪伐
行列頗不完豈非風雷變或者盜賊繁土人對我嘆云
有縣長官為政猛于虎下令如走丸取此為宮室將以

資晏歡良工操斧斤睥睨長林間擇其最高大餘者棄
不觀千夫擁一柱九牛力回旋至今空根悲泣淚尚未
乾彼令誠何心緩急迷後先毫末至合抱忍以頃刻殘
萬衆所庇賴易為一身安居上恬莫問在下畏不言世
事類若斯嗚呼一摧肝

清江三孔集卷二十

欽定四庫全書

清江三孔集卷二十一

宋 孔平仲 撰

古詩

越州飛來山

物之體性重惟有石最堅迴風捲黃沙直下萬丈淵如
何崔嵬山乃解飛青天瑯琊趨會稽道里固甚懸想當
初來時詭異可得言豈非巨靈擘或謂秦帝鞭雷公挾

電母鄰霍相後先夸蛾負崖脚天丁撮其顛北斗借神
兵虎豹下九關海王驅魚送百里聞腥羶悲號與憊喘
洒汗成流川呼雲以自蔽日月不得宣棲鳥失其巢哀
哀啼白猿草木困擺撼枝葉半不全置之秦望陰百怪
散作烟有龍走不轍化作錦色鰻攢身入竅穴噴出清
冷泉都人駭相報平地見巍然既來亦能去惟恐復騰
騫浮屠鎮其上副以屋輝睽朝吟諸佛經莫講西方禪
以此相繫縛羈孤幾十年我聞已有日今朝始攀緣高

堂置美酒遠目凌孤鳶老僧為我說指畫當我前是否
難致詰且進黃金船

和常父寄經

候得早潮來江邊風又起錢唐與海接浩渺無涯淡長
鯨呼鯉魚蛟龍正掉尾豈惟波浪聲號泣半溺鬼臨流
不敢渡尋尺如千里傲幸亦可往無力觸萬死蕭然古
山根容棹于此艤吳亭明可數游觀信為美安敢慕紛
華而不重行止回首卧龍居想在青雲裏相思寂莫晚

誰伴西樓倚

見潮

朝亦見潮來暮亦見潮來維舟不敢渡西望興悠哉

秋夜舟中

昨夜強風萬弩過舟中側聽披衣坐秋來已覺陰氣繁
晨興更見波濤大衰梧弱柳不足數修篁摧折幾百箇
飛簷鬱然方用事一威能令萬物挫人言風怒未渠央
我觀暴忽勢不長會見平川淨如鏡刀魚鳴櫓過錢塘

和常父望湖亭

深灣謂無風試向江頭望
混混過新潮
峩峩起層浪
前驤復後踊
極力不相讓
踏落皆有聲
擺觸頗用壯
游龍出鬣鬣
怒馬軒頸項
紛綸白雪外
疊去不知向
勢將銀漢接
高與海門抗
吳城挂水墨
越估增怊悵
我欲絕橫流
忠信固可仗
丈夫七尺軀
魚腹豈易葬
緬懷馮河戒
艤棹未敢忘
夜夢大樽浮
東行視溟漲
入宮謁陽侯
舉袂揖伍相
問其孰呼吸
乃使此倔強
謝云天所為
茲語

吾恐妄却欲詰蒼蒼無梯不能上

和常父初五日渡江

半旬滯西陵霖雨注船屋昨日風更豪江邊拔長木初
宵尚哮吼海水皆倒蹙向晚稍蕭條飛蘆想遭戮重雲
掃陰晦皎皎見星宿大哉天地內變化反手速我行不
憚早畏此潮信足刀魚頗輕捷舟子短結束十夫共一
舫喜噪比趨陸船頭列火炬幕下燒絳燭蛟龍睡方醒
水陸駭竄伏吟哦未及終已在吳堤曲青山繞逶迤樓

閣媚初旭錢塘雖舊游夢想嘗在目便當跨月輪俯耳
聽清瀑重陽復不遠共采岩前菊

游六和寺

同尋六和寺去旁蒼崖行崢嶸石林氣漚漚流水鳴見
此俗慮減入門心更清盤空到窈窕小憩山前亭天晴
修竹外颯有風雨聲僧云金魚池近日秋雨足餘波落
清壁散作雪色瀑徐興視其流登高穿屈曲忽逢白練飛
碎點濺珠玉清泠振毛髮瀟洒蕩心腹金魚在何處演

漾戲平陸鱗鬣老愈黃點漆作雙目憶為兒童時嘗劇
此池旁聞人說金魚已謂百歲強今踰二十年僧死草
木荒此魚尚無恙纖質不改常謂魚非霧物安得擅久
長四海波浪高三江網羅密長鯨喪明珠幽暗無白日
我疑龍變化就此溪中逸紛綸乾坤爭浩蕩風霆出何
如守一泓無得亦無失

和常父湖州界中

常民踏車將納水今民踏車將出水大田不復見溝塍

洪潦汗漫來千里昨在會稽固已聞湖州春雨夏不止
吹堤卷石冒城郭餘波之瀦此乃是至今蒲羸在民屋
冢樹伐盡生葭葦茅簷破漏不暇完父子瘠瘠瘦相倚
西風搖落天地秋下汗上菜無所收新田今已不可種
閭民出水將安求水乾魚蝦或易得且以咀嚼充饑喉
貧者往往鬻兒女征徭紛紛復不休我從農夫遺斗米
自顧飽食誠堪羞四方近日苦窮乏嗟我有意奚能周

戲張子厚

子厚誇善碁益我以五黑其初示之羸良久出半策波
衝與席卷揅揅見敗址我師如玄雲汗漫滿八極子厚
若殘雪點點無幾白是時秋風高萬里鷹隼擊鷓鴣伏
深枝顧視頗喪魄勒銘亭碑陰所以詫碁客

泛漣水

漣漪二十里清淡得我性微風不復搖天水相與淨秋
容入崖柳晚色依漁艇髻髻會稽游南湖似明鏡

楊道中同行而追隨不可及聞先生在海州

紫芝眉宇不可見一葉小舟如掣電青山雲外半出沒
白鳥溪邊空綯練朝行蒼莽帶殘月暮宿蕭條聞落霰
豈無斗酒為君傾起望蒼波隔長堰

日出

仲冬十一月我行赴高密路出東海上晨起駭初日騰
騰若車輪只向平地出較于昔所見得此十之七蟾蜍
尚弄影皎皎橫參畢輝光一迸散夜氣掃若失扶桑想
可到俗慮苦難訖壯觀曾未厭側嘆流景疾

早行

客興謂已旦出視見落月瘦馬入荒坡霜花重如雪海
風吹萬里兩耳凍幾脫歲晏已苦寒近北尤凜冽况當
清曉行邈此原野濶笠飛帶繞頸指強不能結農家烟
火微炙手粗可熱豈能迂我留而就苟且活仰頭視四
宇夜氣亦漸豁苦心待正晝白日想不闕

夢錫惠墨荅以蜀茶

墨者色自黑黑者墨之宜所以陳玄號聞之于退之近

世工頗拙所巧惟見欺摹成古鼎篆團作革靴皮揮毫
自慘淡色比突中煤誰最畜佳品鄭君真好竒贈我以
所貴有不讓金犀堅如雷公石端若大禹圭研磨出深
黝落紙光陸離較之囊中舊相去乃雲泥辱君此賜固
已厚何以報之乏瓊玖不如投君以嗜好君性嗜茶人
罕有建溪龍鳳想厭多越上槍旗不禁久我收蜀茗亦
可飲得我峨眉高太守人情或以少為珍心若喜之當
造口更憐此物來處遠三峽驚波如電卷江湖重覆十

萬里淮海浩蕩連漪淺舍舟登陸尚相隨今以荅君非
不腆開緘碾潑試一嘗尤稱君家銅葉盞

夜聚楊節之秘校廨厨

雲亂海天低風吹馬耳破黃昏訪主人同向幽齋坐談
資綠酒長歡敵紅裙座倒載夜深歸雪花如掌大

止謁先聖廟者

高密古名城其地近闕里絃歌聲相聞往往重夫子學
宮雖荒涼廟貌頗嚴偉上元施燈燭下俗奠醪醴高焚

百和香競藝黃金紙所求乃福祥此事最鄙俚朝廷謹
庠序五路茲焉始建宮以主之不肖實當此澆敝皆掃
除安可循舊軌丁寧戒闕人來者悉禁止嘗聞之魯論
丘之禱久矣生也既無求歿豈享淫祀夜亭甚清虛古
柏自風起悅之以其道吾祖當亦喜

還楊秘校賦

楊君示我賦一編讀之百復不能已新詞琢就若瑤琨
故實織成侔錦綺可憐苦心自少年近日改科無用此

雖然此才頗富贍貫穿縱橫惟所使有如安車馳大道
左驂驛駒右駟駟東西南北皆可往但顧欲適何如耳
勉旃力習以待舉尺一佇聞招特起他時名望壓盧駱
闊步青雲此馬始

常父寄葦

此物固已美採之從歷山蒙兄遠相寄深意在加餐冷
落齏鹽地蕭條蓬艾間書云次越品寧復昔時歡

讀莊子

損此以錙銖益我以千金豈足為輕重徒能勞爾心履
彼以狐貉蒙此以締綌豈足為厚薄徒能損卿德南山
有鷲鳥睥睨天地秋有意橫八極固非守一丘老鷓嚇
腐鼠安可施于此鷓雛尚不屑况非鷓雛比

郡官送楊文思獨以事不赴

怱怱行人行車馬已在坂主人留客止客畏白日晚陽
闌發哀唱春物况滿眼城中流水長離恨不可浣我雖
居學宮不往若踈懶斯心獨搖搖送客千里遠

夢錫楊節之孫昌齡見過小飲

夢錫更時事慨然君子儒節之瓊樹枝秀氣發扶疎昌
齡出相家謙謹乃絕樞三人于交游得一固有餘日暮
俱訪我止駕共躊躇四天忽陰沉風聲若江湖寒色尚
可畏促膝同附爐高密酒雖貴為君開一壺拳粟自東
越殷榴從上都羹烹歷山葷膾斫注溝魚鮮蛤寔海錯
肥羊非市屠後食淮南蓴此皆北所無主人不敢愛且
以為賓娛夢錫飲中豪節之亦其徒昌齡稍姦黠我勸

勢頗龐左。手扼其肩。右手進觥。孟勉强為我盡。淋漓滿
衣裾。醉坐各忘去。蓬燭已見跼。幽談入鬼怪。巧詭相挪
揄。勿言輕此樂。此樂勝笙竽。明朝酒醒後。相對禮如初。

夢錫遺蔗

憶昔游五嶺。甘蔗彌野潤。一來瑯琊城。此味久所闕。商
人自東南。駕海連天筏。所致雖不多。愛養尚如活。傍求
未得之。分遺意特達。中疑甘露漿。外削紫玉屑。漸欣入
佳境。仍喜對高節。應知方著書。持此解消渴。

呈宋思叔縣丞

宋君吾未識名譽素講聞
海上一邂逅歡然如故人
相交但數語所見已終身
固非輕許與亦有白頭新
之官頗迫促折柳長亭春
馳情自今始悵望西南雲

寄舍弟

西園草碧色南湖水綠波
五雲亭上意爭奈艷陽何

二月一日

春時雖已半春色猶尚淺
海上水霰多城中花木晚
今

朝天氣始微晴萬里東風照眼明南河截水共游賞好
約扁舟載酒行

收家書

早承會稽信晚接清江使兩地千里餘尺書同日至既
知骨肉安復得鄰里事丁寧問兒女委瑣及奴婢開已
視封題親故各有寄牛狸與黃雀路遠不易致東人罕
曾識專享無所遺豈徒抵萬金鼓腹快異味

春天

春天酣酣睡最美日轉花陰猶未起
須臾夢覺聞風聲
波濤翻空千萬里出門四望氣慘淡
寒色射人如潑水
旋見大雪落交加向晚綏綏尚不止
游絲柳絮復何有
百鳥捲舌愁欲死陰陽變化固有漸
乃何暴忽有如此
清江野客心傷悲寂寞無言對桃李

觀舞

宴館簇金絲繡茵呈舞旋雲鬟應節低
蓮步隨歌轉勢
多體不犯妙絕乃習貫會咲有餘情
小揖更微盼

寧采

寧采糞上英莫折園中柳
人情愈薄惡變態在回首
紛紛苦相攻把臂曾締友
陰機多鬼禍似此奚可久
巧言奮南箕定籍挂北斗
豺虎雖不食且使鳥啄口

城南

密州三月猶有寒地平
更在大海上昨朝雨止氣已晴
今日繁陰北風壯城南
颯水傍城流幾處垂楊繫小舟
傳聞寂寂無車馬紅杏天桃各自稠

諸君送黃仲勉戶曹予以事不預遣人送綠楊一

枝贈別

不能送行客贈以綠楊枝試看青青眼此心當自知

春風

春風掃浮雲萬里青天出三星次第呈明月入我室昨
宵苦陰雨並坐不見膝相去能幾時皎皎如白日

送夢錫往齊州

望君之行車既遠目亦收惟有隨君心千里不能休我

兄在歷城相別歲已周音問月三四東西交置郵豈如
一相見君今涉其州為我道亡恙深言致綢繆先馳魂
夢往迎子鵲山頭

晚出

空城鳥欲棲漸夕收寒暑槐葉綠生風椿花落如雨出
門何所適有口不敢語披豁向青天望銷雲一縷

常父寄半夏

齊州多半夏採自鵲山陽累累圓且白千里遠寄將新

婦初解包諸子喜若狂皆云已法製無滑可以嘗大兒
強占據端坐斥四旁次女出其腋一攫已半亡須臾被
辛螫棄餘不復藏競以手捫舌啼噪滿中堂父至笑且
驚亟使啖以薑中宵方稍定久此燈燭光大鈞播萬物
不擇窳與良虎掌出深谷鳶頭蔽高岡春草善殺魚野
葛挽人腸各以類自播敢問孰主張水玉名雖佳神農
錄之方其外則皎潔其中慕堅剛奈何蘊毒性入口有
所傷老兄好服食似此亦可防急難我輩事感惕成此

章

送董監部赴舉

西風槐半黃，行客車馬動。揚鞭望都城，壯氣不可控。朝廷新改科，詩賦斤無用。君能通古書，義理善折衷。先鋒陳典謨，後騎出歌貢。以茲趨大敵，坐可圖百中。青春聞喜處，醉弁宮花重。去矣當自強，勿作思歸夢。

惜別為從道作

嘗聞直諒冠三友，自古才難非特今。今也負肩事謔笑。

君獨苦口工規箴我常從之求過失箕踞慢罵猶甘心
其言未必俱中理披沙往往逢黃金今將去矣誰復嗣
已覺別恨凌秋陰胸中抖擻宜一盡留作更久相思深

送從道

去年風雲攪天暗君馬區區之海涯今年苦寒又訪別
正是去年行役時信陽雖遠重來得小桃常探春消息
如今官滿去不返又見花開誰記憶乾坤浩蕩歸無鄉
歲月崢嶸老相逼一官奔走隨所使後期會合知南北

篇詩惜別人少和須知此別真可惜黃髯半醉舌若蜚
它日樽前無此客

出城

駐馬河之西送車皆已返郊原人漸少風物秋將晚身
如獨鳥輕意與青山遠

迷途

吹燈治行裝戴月即前路深村苦多歧乃使行者悞東
西皆可往曲折何所遇泥中虎鬪跡草木新封墓陰雲

忽以興四顧增恐懼及今亦誰咎初夫在跬步林木杳
崢嶸邱原莽回互雖聞叱牛聲欲問不知處

費縣

途經古費邑遺堞草萊平東瞻龜蒙山西望嶺東城弗
擾以畔召仲尼猶欲行許由亦有塚孑孑何獨清

遇雨

客行日暮飢且渴况值漫山雨未絕蜀黍林中氣慘淡
黃牛岡頭路曲折狂風亂掣紙傘飛瘦馬屢拜油裳裂

記得默齋端坐時
惟愛霽霓洗煩熱

宵興

宵興視星斗側身坐
長嘆秋風忽已至
萬木鳴珊珊垂
鬢初執卷結髮乃
彈冠功名當及時
一失何由還丈夫
惜少壯日月如走
丸念躬累尚寡筋
力無所難白首佩
黃金意氣亦已闌
所以飛騰心顧盼
生羽翰詩人詠嵩
高不爾歌考槃胡
為兩未決碌碌守
一官

呈夢錫

欽定四庫全書

妻孥能相期每出必遽還如其歸稍晚必謁鄭推官

又

與君來往半歲餘三日不見已為踈入門褫帶不相揖
下馬且復休僕夫形骸禮數不足問但論肝膈之何如
昨朝萬事俱撥置與子齋中同負爐去時苦寒冒風雪
歸路清輝踏霜月但取樽前笑語歡豈知門外陰晴別

韓大夫城

大夫今安在唯有廢城存流水抱沙曲依依楊柳村居

者五六家荆榛深閉門青青麥隴直藹藹桑枝繁牛羊
任所適僮稚更不喧啼鳥靜逾遠落花風自翻昔稱老
農賤吾意堊人尊謀身莽無定大息視乾坤

青州作

京東地平夷自古四戰國九州此居三山海在封域北
趨京洛近南卷江淮直富饒足魚鹽飽煖徧年麥英雄
欲飛騰假此為羽翼隆準感秦亡金墓伺唐隙方今不
憂此所重只西北兵防最寡少主帥失銓擇蒿萊蔽城

隍繡溢滿戈戟慢為盜之資忽者禍所植吾視士大夫
赳赳半雄特訝謠尚慷慨濶達本多匿腹心宜先安豫
倘乃長策衆方誦太平我乃虞盜賊雖言亦誰聽痛哭
損肝膈

立秋日呈夢錫

今日纔立秋涼風已蕭瑟我不感時節念子行有日憶
初同赴官相後惟一月子先脫然去我獨不得發江邊
舍未還汴上生計足古之仕為榮今則富者福子隨鴻

鵠高我戀升斗食豈徒別離悲更有長太息

曾子固令詠齊州景物作二十一詩以獻

閱武堂

開拓乾坤遠歡娛歲序深堂前猶閱武自是太平心

閱武堂下新渠

東來細溜長西去餘波漲能收四海心樂此一渠上

凝香齋

東郡經年久西齋一事無蕭然靜相對惟有博山爐

芍藥廳

芍藥花初發，牽公詩思濃。
露紅烟紫句，全勝綠盤龍。

仁風廳

太守政何如，茲焉名可見。
齊州一萬家，揮以袞宏扇。

竹齋

浙浙風敲韻，亭亭日轉陰。
公應喜來此，相得歲寒心。

水香亭

龍頭落潺湲，雁齒駕清淺。
夜闌氣益佳，雨霽香尤遠。

采香亭

芙蓉近可攀
香草供幽賦
公才如命騷
此是冥搜處

靜化堂

四境靜山川
一枕閒風月
野水抱城幽
青天垂木末

鵲山亭

老杜詩猶在
重華事已無
千秋陵谷變
塵起鵲山湖

芙蓉橋

出城跨宮堯
鷺目見花艷
飛蓋每來游
佳境此其漸

芙蓉臺

漾舟入芙蓉花亂舟欹側安穩此凭欄清香生履舄

環波亭

瀟洒塵埃外崔嵬清淺中四軒春水濶兩岸畫橋通

水西橋

景物此清淡幽亭獨細論恐人容易過常鎖水西門

水西亭

河流春已深野色晚更靜生計慕園畦歸心付漁艇

西湖

芙渠十頃濶藻荇一篙深
晚日江鄉景秋風澤國心

百花橋

花滿紅橋外尋芳未渡橋
春風相調引已有異香飄

北湖

塵汗遠已留淥淨此不雜
僻招水鳥棲清數游魚鬣

百花臺

南瞻復北顧春水綠漫漫
此地尋花柳全勝別處看

百花堤

花發紅雲合公來醉玉顏
傍城行怯遠却泛小舟迴

北渚亭

高深極前臨蒼莽接迴眺
齊州景物多于此領其要

又寄夢錫

自君卧漳濱我意恍若疾
無人與笑言兀兀守一室
當寢或不寢當食或不食
有思氣填胸可駭幾戰慄
想君端在家比我乃安逸
妻孥以嬉娛簿領久閣筆
南城趨

北城道路無所隔我豈無僕馬子不見賓客噦亭足清
風林木助蕭瑟葵花無數開蓮葉亦已出起來定何時
幸會能幾日已令鴛白醪待子歡促膝

寄王達夫高密令

高城已吹角月暗星河落與子語不休青燈全寂寞平
明車馬去匆匆一飯相邀不得同交情世契兩皆厚東
望白雲千萬重

謁夢錫見几上粉箋援筆書此

飄飄

一作
飄飄

雲容高慘慘日色薄此時駕君車去意不可

縛鳴蟬送淒切白露催搖落山城更海上觸目添蕭索

晚集城樓

高樓百尺修木尾對面南山翠相倚凭欄談笑青雲裡
秋標摩空日色死海風蕭蕭東萬里吹襟洗髻清如水
下視黃埃濁波起車馬紛紜只蝼蟻

陰山七騎

青氊作帽黑藥靴進退颯颯生風沙夷歌夷舞兩跪拜

問渠何為乃至此象渠之人假為之朱顏的皜秀兩眉
手操弓天仰視天如見飛雁馳平川主稱此樂直萬錢
坐客競飲黃金船世人見識無百年追歡收快貴目前
當時披髮祭于野自非辛有誰知者

君住

君住水西我水東東岸波生西岸風哀哉中截錦繡段
上襦下裳各一半小星隆隆怒且鳴前驅貪狼後攬槍
何如盡遣收芒角惟放當天皓月行

雞冠

我初種雞冠其小乃毫芒曾未得幾時忽已過我長根
株既猥大枝葉亦開張吐花凌朝曦生意殊未央陰風
自西來慘淡驅清霜一夜忽變故葉萎花已黃當此繁
盛時為爾賞壺觴及今乃腐草好玩安可常呼童盡剪
拔昔恐踐踏傷庭除稍曠濶耳目加清涼竹枝久蒙蔽
迥立獨蒼蒼

月三章

夜如何其月在隅問行何為乃躊躇海波壓輪不得驅
中庭有客心不樂欲挽玉兔鞭蟾蜍

夜如何其月正美起視萬物如明水山魃避人鬼火死
中庭有客立不移何暇眼力看箕尾

夜如何其月落愁光輝奄奄星益稠白雲擁漢波不流
中庭有客心不樂放志萬里誰能收

代小子廣孫寄翁翁

爹爹來密州再歲得兩子牙兒秀且厚鄭鄭已生齒翁

翁尚未見既見想懽喜廣孫讀書多寫字輒兩紙三三
足精神大安能步履翁翁雖舊識伎倆非昔比何時得
團聚盡使羅拜跪婆婆到輦下翁翁在省裏大婆八十
五寢膳近何似爹爹與妳妳無日不思爾每到時節佳
或對飲食美一一俱上心歸期當屈指昨日又開爐連
天北風起飲闌却蕭條舉目數千里

詠無核红柿

林中有丹果壓枝一何稠為柿已軟美嗟爾骨亦柔風

霜變顏色雨露加膏油大哉造化心于爾何綢繆荆筐載趨市價
賤良易求剖心無所有入口頗相投為粟外屈強者所不收為
粟中亦剛飼兕戟其喉衆言咀嚼快惟爾無所憂排羅置前列圓
熟當高秋且以悅一時長久豈暇謀吐哉潰爛速棄擲將誰尤

寄從道

憶初撫掌笑嘗謂子猿猱斑然武而文譏罵舌若刀髭
黃喉骨結內敏見秋毫論官則甚微意氣一何高今思
乃麟鳳百十未易遭子行白日靜回首常蕭騷聞子在

定州深山坐披毛何如東海上萬疊觀波濤不見歲再
晚北風方怒嘍圍爐捧美酒思子持蟹螯

食桃

剪彼十圍木架此百尺梁十圍不加大百尺不加長胡
為被錦綉空爾飾文章根斷膚已剝至朽不復昌一作榮

食桃棄其核下與糞壤蔽一作并雨露之所濡發生乃微

芒回首枝幹大冉冉出我牆開花又結子意態何煌煌

出郭

出郭十里餘蒼莽迎遠目桑枝強崢嶸榆柳已先禿誰
言禾黍熟飢鳥不滿腹平時想郊居至此思邑屋北風
吹層陰冉冉白日速及歸已云暮景色異初矚去年十
二月踏雪茲往復嗟今再見冬回首如信宿

太守視新堂

遙遙元崇冑藹藹東州守留心學校事遇我在僚友蔽空
起新堂磬鼓百夫走枉駕親視之丁寧到棖科北風沙眯
眼佇立相與久宴我登哦亭推我居席首初嘗百花釀着

藪無不有是日十月中新霜脫人肘醺酣一消鑠和氣回
物朽昔人歌魯侯在泮嘗飲酒我今作此詩亦以綴厥
後美哉姚侯政豈弟民父母此詩所不歌先已載民口

日月

月行一何速暫上青山還復落衆星厥弛不肯休參橫
畢直爭頭角日行比月更疾馳一日一夜繞天圍光輝
所燭萬里同墻邊炙背快老翁

孤鴈

空城夜已寂一鴈度雲端汀洲亦可止何不怕霜寒豈
非防暗禍驚矯失自安孤音訴明月天高路漫漫以鵲
置懷袖比汝乏羽翰蒙恩傍溫暖豈念宵征難

祈雨

皇天久不雨旱風滿東國春田廢鉏犁秋事闕牟麥縣
官緊租賦守令抱憂責交馳謁羣望不敢愛牲帛而我
處學宮于邦乃賓客霜寒怯早起卧聽車馬遶方茲祈
求急不預奔走役精誠倘蒙報豈不沾潤澤古有支離

形亦有支離德而我頗施施支離在官職雖然憫元元
覽鏡見顏色高詠雲漢篇千秋意悽惻

墻東新圃

平時乃糞壤此日遣把鋤豈徒植花卉兼列果與蔬去
家無百步幽境若邨墟君公茲避世聊慰憶荒廬春風
尋細草夜月倚高梧穿垣置小戶直接東城隅

食鰕

風流東武鰕三月已看花及冬稍稍盛來自滄海涯味

腴半附石體潔不藏沙被之以火光何幸掛齒牙一舉
連十頭不復錄魚蝦海物類多毒惟汝性則佳清水洗
病眸七九為等差況今咀其肉課効想更加劉邕最可
怪辛苦剝瘡痂

食梨

東方早寒雪霜摯新梨十月已滿市削成黃臘圓且長
味甘骨冷體有香芳尊命友先衆果百十磊砢升君堂
贈君玉壺曾水之皎潔副以金莖皓露之清涼柰何撥

火取煨栗梨雖至美或不當顰眉三嚙手摩腹謂此發
病為第一奪之兒口飴止哭君不記南方無此物五更
酒渴喚水時思此千里莫致之及今乃以多見賤南方
橘柚東方梨

十月二十一日夜

統統有時打兩鼓星河漫漫參在戶百鳥已棲人不行
西南洶洶有異聲有若鬼神移山嶽又如戰敗百萬兵
出門望見乃火起椽落瓦裂咫尺鳴問之相去一里間

紅光爍爍侵天明長烟涌波月魄死其間有物如撒星
是時久旱水泉竭高屋一燎如毛翎小兒但知聚看笑
不知擾擾人縱橫皇皇奔走最可念耿耿不寢心飛驚
明朝出視火起處焦木頽垣不知數白頭老姥啼向天
嘆息之聲滿行路

觀馬騎

馬軍上馬挾角弓東西排列次第同鳴金一敵馳且射
七十二足如旋風黃塵紛紛有殺氣得雋呼聲動天地

想見陰山血戰時
出沒飛騰千萬騎

會食

學官不置酒相聚惟一鉢
公家事何多容至日已晚乘
飢騁大嚼美惡寧復揀僕夫無所餘
頗我色不滿潑茶旋煎湯就火自烘盞
從容共談謔孰視笑而睨昌齡豈
其愠策馬獨先返

集于昌齡之舍

初筵悄無語良久歡且發
就爐自溫杯覺此飲量濶既

觀舞袖垂又聽歌聲闋醉心漸紛紜醉眼成恍惚勿輕
栢直狗所負尚可悅當年入績事今日逼華髮愈令坐
客心感嘆惜時節夜長更恐曉起挽青天月



清江三孔集卷二十一

欽定四庫全書

集部

清江三孔集卷二十二

詳校官中書臣張經田

助教臣常循覆勅

總校官知縣臣楊懋珩

校對官助教臣羅萬選

謄錄監生臣程學道

欽定四庫全書

清江三孔集卷二十二

宋 孔平仲 撰

古詩

常山四詩

并序

熙寧六年之仲冬太守以早有事于常山平仲職在
學校不預祭祀太守以常山密之望而太守出城為
非常故師以往平仲既不辭又不敢無言以助所請

也作迎神酌神禱神送神四詩以畀祠官

迎神

木撼撼兮若有聞風回回兮吹塵神之來兮何暮斗斜
月落兮夜將向晨跪捧香兮謹以俟久注目兮山雲

酌神

不敢告勞兮山之盤盤祀事孔脩兮誠心亦殫陳有羞
兮堂下奠旨酒兮石之間神庶幾兮享此既醉且飽兮
留聽余言

禱神

歲且大旱兮田事甚荒疫癘將作兮火苗流行循神之
名兮其德有常靈鑒不遠兮照此忱誠出雲洩洩兮靈
雨其雩庶幾此民兮不乏粢盛

送神

巫傴僂兮告神將歸屏息再拜兮儼若初來神之樂兮
游行風為車兮雲為旂槁者待蘇兮瘠者需肥自今已
往兮余日望之

大風吟

昨宵月暈大如輪，邪氣來逼金波渾。
嫦娥怨泣帝所聞，飛符北方起風神。
聲如驅濤洗陰雲，欲以快意乃自昏。
紛紛欲盡江南土，散作彌天萬里塵。

兄長舟次會稽，以十月九日發書清江親故，以此
日遣使，仍以十一月十二日同到，去歲會稽書
清江人亦同日到，嘗有詩記其事。

清江在何處，限以龍王大孤彭浪之險阻。
鄱陽彭蠡淮

海之波濤會稽在何處錢塘江邊風浪惡金山寺下鼉
鼉驕大冬雪霜道路塞飢年往往多盜賊如何兩處發
書日月全至此亦不差頃刻開緘讀訖更反復兩處久
不通消息丁寧勞問若相見滿堂歡喜動顏色枝間鵲
噪今幾日摠報平安豈非吉年年歲晏享異味牛狸黃
雀并金橘從容進僕問鄉閭歸心倏起成蕭瑟

十一月二十日德音

敕書夜半至主者不能發星辰稍低回萬里收落月平

明宣帝詞軫慮極惓惓所憂在愆陽雨澤嗟久竭周王
望雲漢湯后訟女謁又聞泰一馭已駐黃金闕所至為
福祥行當掃災孽因茲肆大肯洗滌如海濶上刑脫窀
穸輕繫弛繲紼生還今可期向者或長訣謹呼滿行道
感泣有白髮苟非皇恩深安得汝輩活千城聚和氣散
作連天雪

宿潞澤

出城雲物好更聽歌聲發行路已微陰暮村逢霰雪衾

寒不成寐奄奄殘燈滅

召伯水落

朝落一寸水暮落一寸水卷水去入湖更值南風起舟
行意雖急滯礙乃如此蠢蠢在吾前千艘正銜尾

舟行却回

清晨移舟出沙背宿氛卷盡天如洗日高五大行十里
白雲之中黑雲起回舟急趨舊泊處四山沉沉日色死
逆風颯颯初尚微浪頭已高白叅差又聞西北崩崖陷

谷有異聲大風橫擊波如鱗操舟之子雖習貫掣柁才
開又投岸有如磁石引針去時時颭撲愁中斷長篙勁
艣不易勝僅得入口如再生迴望後舟尚出沒使人淚
落肝膽驚昨日廟中奠旨酒巫語甚吉許我行奈何中
路輒反覆欺誕何者為神明豈非風者天號令必欲逆
知非汝能浪傳消息得醉飽萬一猶足為威靈

長蘆詠蝗

飛蝗乎飛蝗乎誰使汝為飛蝗而如此之孽也一氣所

生乃自然百蟲之中何為者若歲大旱汝則多人雖畏
之可奈何來時漫不見首尾往往蔽日連數里河南却
集河北岍東邨西邨鬧如螳捕逐百千才十一入地如
雖又生子山林所過為一空萬口颯颯如雨風稻梁黍
稷復何有田疇已盡腹未充農夫去歲望得雪千耦輩
作乘春發耕耘喜及苗已長與汝何冤乃遭齧忍見深
冬瘦如腊徵賦繁興蓄積缺我有薄田在江州五歲之
中三不收流災得無及彼土搏手安敢期高秋陰陽調

和非我事凍餒逼迫同民憂有生所往隨有累不及飲
啄波中鷗

金陵觀雨

丞相初下車憂勤到南畝旱乾為祈禱甘雨輒盈缶氣
從鍾山發浪入秦淮吼奔騰與擺撼執熱復何有我時
在舟中清爽浮戶牖垢衣得浣濯快意一搔首深宵對
明月滅燭坐更久昨日見投龍于今慰枯朽至誠必有
答况乃調元手

觀暴

怒雷殷殷西南天黑氣一抹如長烟鯨噓鼇噫

去蛟吐聲

涎龍呼其儔相後先散為飛雲蓋蜿蜒以尾卷海洒百川河伯乃在坎底眠震驚掉動憂不全白浪湧起高于船岡馳濕舞山回旋崩衝擺落蔚高騫聲勢烈烈孰使然須臾寂靜又改前餘氣倚漢猶青玄小鰈奮頭如自賢神龍歸宮魚出泉

太平

長江卷波作沙色中有數頃如潑墨是為望夫之高山
沉沉影落江心黑操篙下探不見底側行牽挽難為力
疾風為我西北來打鼓張帆何快哉百夫呼噪絕水府
心膽壯敵山崔嵬須臾已入大信口回聽怒浪聲如雷
姑孰堂前溪水清扁舟夜泊已三更微微雨過有秋意
漠漠雲開對月明

觀牛渡江

荷蓑而騎彼牧童驅牛亂流江水中徐行不復用鞭箠

母當其前犢後從濁波沄沄出頭角見者往往疑蛟龍牛
身千鈞水不測步步乃與丘陵同天機自然有所解物
理如此誰能窮君不見軋犖山腹垂至膝一馬不能載
其躬帝前每作胡旋舞翩翩勁捷如旋風

太平

溪行曲入四五里乃見江城大如斗人煙踈少白日靜
風物澄明新雨後古來豪俊多在此悵望千秋一回首
謝家青山空自高李白扁舟復何有

泊舟姑孰堂

崎嶇遵狹港託庇倚葭蘆泊舟姑孰堂乃在溪上居此
溪來處遠東引丹陽湖微風起天外爽氣得秋初而我
尚厭暑卷簾心不舒蓬頭赤兩腳躑躅遠四隅坐砌未
為愜愜身卧碑跌中宵倦搖箠流汗落衣裙因觀今則
然自問昔何如人情有未足不見有有餘

于將軍

長安遣兵百勝強意氣何有漢中王七軍之心俱猛鷲

虎兕揮羽將翔睥睨荆益可席卷白帝城高如堵墻
秣馬蓐食朝欲戰雷聲殷殷山之陽沉陰苦雨十餘日
漢水溢出高騰漲蒼黃不暇治步伍攀緣蹙踏半死傷
計窮豈不欲奔走四望如海皆茫茫鼉鳴魚躍尚恐懼
萬一敵至誰敢當遙觀大船載旗鼓聞說乃是闕雲長
蒙衝直繞長堤下勁弩強弓無敵者雖有鐵騎何所施
排空白浪如奔馬將軍拱手就繫縛咋舌無聲面深赭
捷書一日到錦城隻輪不返皆西行將軍疇昔負朋友

若此昌豨猶得生循環報復雖天意壯士所惜惟功名
曹瞞相知三十年臨危不及龐明賢歸來頭白已顛顛
泣涕頓首尤可憐高陵畫像何詭譎乃令慙痛入九泉
涓水之師勇冠世英雄成敗皆偶然

紫髯將軍

華容女子哭幽囚吉利如虎入荊州縛其孤雛斂鬣貅
長驅水步八十萬欲獵于吳吳主憂羣臣勸迎同一說
拔刀斫案心膽裂揆彼之量豈我容開門納狼計何拙

魯家狂兒策最長，倡而和者有周郎。區區黃蓋乃乞降，
龍幡遮火燒赤壁，東南風急天絳色。江中戰舸岸上營，
煙焰飛騰半焚溺。雷鼓大進聲滿川，輕銳迫逐皆崩奔。
紫髯將軍更歡喜，曹公坐翅不得騫。子布元表何齷齪，
成敗之決在一言。君不見甘露寶鼎間，典午受禪吳猶
存青蓋入洛，雖可惜猶勝。俛首臣老賊。

武宗

武宗惟雄俊，有臣委用專。德裕才畧大，感恩聲所宣。是

時岩廊上六合氣可吞論兵決勝負萬里在目前一平
回鶻亮再洗上黨昏楊弁不知時迺敢盜太原豈信明
光甲遣人斬其元廷謀昧知幾唯有君相然成立三大
功慷慨在一言風霆運不測日月朗高懸李唐勢已去
至此岌復纏外內已息兵崇卑定乾坤遂令河北師弭
耳如孤豚事書史冊上讀之快心魂千載若信宿凜凜
風烈存世人多說劍不見斫伐痕玩弄反自傷何用飾
璵璠迂哉賈生餌果爾房琯奔施為貴寔效詎主銜空

文

奉天行

蒼蒼行露出苑門孤城逼仄不可存賊兵之來若風雨
頃刻城下皆雲屯紛紛矢石蔽空黑天子垂泣對將軍
將軍提筆書滿背城中白丁久奪氣草車之焚雖已矣
雲橋百尺虹蜺起下瞰城中笑飲酒乾陵赭袍擁朱紫
朔方大將來赴急彷徨中路不敢入豺狼合從堪慟哭
翠華崎嶇又巡蜀聖神文武何至此堂上有人面如鬼

天門山

惟天莽蒼蒼乃立此門闕山本如城高剖鑿中斷裂兩
峰競秀倚千古勢相憂大江方南來逼束不得洩潑為
無底深散作萬頃濶想當割據時閉固孰敢發夕陽坐
荒亭詩思摹峭拔清晨放舟出回首見呀豁西梁尚局促
壯觀心頗闊安得呼化工努力更一握

靈璧東

明珠大貝玉玲瓏美人營營出深宮清驢一盼失英雄

羽觴行酒樂未終胡陵殺氣迴飛鴻投杯擲筋自挽弓
麾兵大戰靈壁東血流爭波入海紅何為羈孤鐵馬中
搗沙折木天北風突圍而出追失蹤四五年間蛇作龍

題贛州嘉濟廟祈雨感應

江東禱雨真靈跡香火未收簷溜滴城中到此夜五更
渡口歸時水三尺高田流滿入低田萬耦齊耕破曉烟
但願吾民得飽飯年年歲歲是豐年

答陳君佐戲吟

與君居兩邦如隔萬里道相從得旬日所恨太不早清
談已解憂大笑時絕倒贈我以古風應手拾瓌寶間亦
藏戲言顧我欲高蹈答之以不答羨子富文藻滄溟在
人外中有群仙島相約逍遙游餐霞食瑤草

游子吟

遠游如飛蓬漂泊天之涯不及百尺樓繫在垂楊堤琉
璃為鍾玉為箏繁絃促管花陰下青春此樂輸幾人客
身皇皇一羸馬

汴堤行

長堤杳杳如絲直
隱以金椎密無迹
當年何人種綠榆
千里分陰送行客
波間交語船上下
馬頭揖別人南北
日輪西入鳥不飛
從古舟車無斷時

酒帘

百尺風外帘常時
懸高閣苦誇酒味
美聊勸行人酌
但澆愁腸寬
莫畏守犬惡
客心方搖旌
逢此慰寂寞

書驛舍壁

巍巍使館開華堂行人舊題詩滿堂去年讀之多好語
今歲重尋在何處驛吏却云官長來聖以赤白墁青灰
銀鈞錯落應手沒當時嘲謔誰為才嗚呼萬事抵如此
古人豪強安在哉寄語征途往還客不如揮毫落金石
金石雖堅有時滅君不聞海波成田淮水絕

發虹縣

驅馬汴河西從此游帝鄉瞻言驛堠短喜及春日長碧
瓦映茅茨人烟密相望藟芟足供馬亦有酒可嘗旁觀

波瀾起萬柁攢舟航一跌性命已豈惟肌骨傷不如榆
柳堤中路穩騰驤去家漸及旬猶走淮楚疆却視故山
隱忽在天一方東軒復難到蘭茝媚幽香馳光不可留
游女已採桑

水頭

荒灣斗轉河如束千古癡龍卧空谷公然收水入毫芒
萬里崑崙頃不足春妍睡醒鱗甲開頃刻已放波頭來
衝梢掠標何迅速噴雲濺雪爭崔嵬舟人傳呼隘兩岼

駭若百蟄逢驚雷連樁繫纜猶恐脫不爾船碇俱傾頽
須臾水面如平掌客子棹歌船下上

峴山行

驅馬峴山南磴滑不能上惆悵石城人秋風搖兩漿

寄王彥昭教授

別君已經年相見如一日分教淮南生中路忽相失我
志如柳惠何嘗厭三黜君才如叔夜猶苦不堪七趣向
大抵同離合何不一輕裝入隋堤正值柳陰密倉唐交

交飛布穀命其匹壯歲甘遠游豈暇念家室永城去亳
近馬足翩翩逸我往何時還君處不能出新詩近應多
爛漫排古律黃花不可見誰為子鳴瑟交游固難得會
面那易必作詩寄秋風以寫胸中鬱

書所見

昂昂林邊鶴何事不天飛徘徊方塘面獨啄青苔衣得
非戀其傍修竹垂芳菲高竿擢春秀清影弄朝暉曾于
畫圖見恍若迷是非興與佳景會悠然久忘機

村鼓

潭潭村鼓鳴羨爾田家樂閃閃綠榆叢風清如葦籥我
懷物外趣世味久零落焉得太古民相攜去耕鑿

鄧陽觀碁

繫馬鄧陽岸湍波怒奔霆却坐南軒上曠若耳目清兩
翁方圍碁玉石相分爭初味若恬淡鋒交漸縱橫攻南
意窺址翻復乃人情計慮臨危出或從死中生勇者喜
見色怯者噤無聲誰云一枰小鬪智亦已精昔有爛柯

者棄俗游崢嶸彼實方外人歲月固可輕我今則異此
久為世網嬰一官猶坎軻三徑尚未耕妻子寄異縣飄
飄望東京寸晷尤可惜客子當念程飲水上馬去兩翁
任輸贏

蝴蝶行

蝴蝶飛渡河來河北花已落河南花正開盈盈採花女
撲打還家去推身飛入粉奩中芳草綿綿舊時路

枯柳

窾枯路傍柳種插從何年枯條不可見人立何歸然輕
脆豈耐久心腹俱空穿上無一鳥巢下繫萬里船想見
方濃時飛花舞青天行人多攀折慘淡駐征鞭今也傲
突兀東西過誰憐陋質非焦桐難試朱絲絃英華餘歲
許白蟻爭回旋雷公飛火試一照深處恐有垂龍眠

戲寄邵瞻遠

道人養金丹笑我餐芝朮青瞳何皎然照映冰雪質壺
中玉樓好天外鷲驂逸境清莫回顧世味甜如蜜

車班班

車班班入函關馬蕭蕭渡渭橋闕下游人不相識橋邊
美酒留行客海濶天高雲滿空風吹日暮還南北

發穀熟縣寄揚州同寮

清晨出古縣獨遇賣花翁芍藥三數朶瓊苞出漸紅皎
如情人未梳洗朱簾半掩嬌春風去年維揚陪勝賞此
花開謝旬月中名園勝利處處有深畦淺壟無西東品
流已多搜絕異若數英俊遺凡庸通年新花更奇巧造

化彫琢何時窮離家今日已千里雲雨浩蕩迷淮東而
今又及賞花月因循不賞花更空寄語維揚好相識花
時勉泛黃金鍾

別二友

鶴棲萬年松孤音夜號霜雙鳳想其悲一來助翱翔會
合歡未已離別慘可傷驚風動地起彼此隨飄揚鶴飛
望南山鳳亦歸故鄉回頭失舊侶雲路徒蒼蒼

東樓置酒賞桃花

朱樓直瞰清池灣池上彩翠多奇山春光爛漫桃李發
倒影照映澄波間遠看已好重攀折堆積金盤霞間雪
促拍更歌金縷衣不辭醉倒花時節歸來酒醒夢闌時
袖上餘香猶未滅

寄勉甫

猛虎不伏檻搏鵬笑鞬鷹丈夫志四海羞愧守門庭君
實豪傑士貧賤鄉人輕憤發策蹇驅西走游玉京負書
入太學大帶叅諸生文章逸莫控學問驟以升曾未年

歲餘譁譁得聲名定知有所立俯拾紫與青顧我孤陋者聾聵其聰明譬如山下泉碍險尚未行無人為激進安得歸滄溟所願同君游揚波浩東傾此志何日遂長呼涕淋纓北望風誼美心焉如旆旌

落花

嶺南冬深花照灼比至春初花已落乘閒攜酒到西園鳥散蜂歸春寂寞江南此際春如何紅杏海棠開正多歸期不及春風日猶見池塘著綠荷

送客到江亭

春江碧波渺天去
兩岸紅桃落如雨
主人到此送行人
落日留連會歌舞
渡頭楊柳正依依
拂水搖風千萬絲
看看亦整東歸棹
誰折長條贈我歸

剪玫瑰寄梅之仍書此為戲

去年君嘗寄薔薇
今年我亦寄玫瑰
薔薇赭赤未足愛
玫瑰瑩赭花草魁
南園春深桃杏落
但見芳草連莓苔
唯茲皎潔滿欄檻
玉冠瑤佩天邊來
主人愛惜屢顧眄

賞心未暇攜樽壘寄君憑君巧吟咏仍須對景傾金杯
莫令薔薇竊見此恐遂羞媿不復開

寄鄒蹇叔

西園春深百草長殘花紛紛綠葉光蜂歸蝶散情已薄
獨我遶樹行如狂亟令沽酒藉地飲卧嗅落蕊傾金觴
醉來意氣頗脫畧睨睨天地如毫芒狂歌大笑誰對值
山猿谷鳥啼斜陽却思高陽舊徒侶安得飛至坐我傍
登城引望不可見雲峯古木徒蒼蒼

南卒

坐食者南卒驕與子弟俱負甲則俯偻荷戈不能趨嘈
然金鼓鳴氣駭失所圖固無一技良徒有七尺軀吾聞
孫子教弱女成武夫吾欲練汝輩使之虺虎如奈何天
子詔苦禁蓄兵書軍旅非素習壯士心踟躕羣蠻屢駭
動主將復佐除有急何以報思之可驚吁

夜聞蒼鶴唳

為雀不能白安用蒼其形厥頂又不朱無乃盜虛名雌

雄守枯木絕意冲太清夜號如嬰兒聒我夢寐驚日欲
火其巢念汝雛方生亟宜罷叨噪報我存養情

愍囚

囚豈不樂有父母囚豈不樂有室家公行劫掠自取死
迫于窮餓情非它腥膻所得能幾許哭入東市肩相摩
嗚呼法令難力救囚乎囚乎奈若何

移石

誰言盤石堅勢不可動搖健犢引大車載行速如飄良

因植根淺未免遷徙勞觸類當自省我今慎所操

春夕寄兄長

南北萬里道兄弟隔年別嬉鸞獲翹翔病馬隻羈紲反
闕危坐久顧影愁腸絕清夜不可晨吟殘半窻月

養虎

西隣養虎已被齧東隣養虎計何拙哺之既久爪牙強
定看一日難羈紲寄語東隣宜早圖野心變態在須臾
壯士匣中有神劍欲斬虎頭君許無

折楊柳

江頭楊柳春依依
主人此時傷別離
留連祖席日欲晚
風弄綠影搖金卮
手攀長條贈君歸
紛紛閒愁如絮飛
人生聚散似魚鴈
此柳春深有幾枝

王昭君

昭君十五入漢宮
自倚花艷如芙蓉
黃金不買畫者筆
西子變作嫫女容
羊車忽畧久不幸
夜夜月照羅帷空
嬌癡怨恨掩袂泣
常恐蘭蕙摧霜風
不堪坐守寂寞苦

遂願將身嫁朔漠神仙縹緲下朝陽再拜玉墀辭漢主
天顏驚顧初相識自起欲留留不得吁嗟拂袖歸禁中
却看飛燕無顏色嬋娟去去陰山道幾日風沙貌枯槁
千秋萬古恨無窮墳上春風無寸草

春日行

鶯啼花笑清明天黃金買酒斗十千良時恣意一酩酊
醉倒扶起南堂眠須臾更深殘酒醒明月當窗風氣冷
閒愁萬緒從中來幾欲長號淚如綆

子夜四時歌

春

二月春色來三月春色老東風收花去滿地留芳草

夏

火雲堆長空赤日沸岩瀑芙蓉已焦死不減篔簹綠

秋

慘淡秋雲高蕭瑟西風起坐感歲華遷悲歌淚如水

冬

風淒薄愁雲雨冷成飛雪莫作苦寒吟行行桃李月

和經父秋夕

燕籟愛蟲吟淒音悲漏永青燈無定焰照此心情冷風
生蕙悵寒月滿松窓靜萬慮歸寂寥都忘榮辱境

古賦

戰彭城賦

秦失其鹿群雄並爭劉項之鬪自為鯤鯨相劫以勢相
鏖以兵彼方徇乎北海此乃襲乎彭城惟彭城者楚所

都也漢王乃竊而居之收其美人寶貨是資置酒高會
楚猶未知此何異伺猛虎之出而據其穴入盜跖之室
而有其妃項王聞之怒膽摧裂聲若雷震目如電掣引
千旌與萬騎定雌雄于一決或馳或射或刺或擊呼聲
動天死者如積流血丹乎睢水棄甲隘乎霸壁乃欲殺
無噍類掃不留迹長圍三匝漢軍失色嗚呼以項王之
勇天下所聞喑鳴叱咤坐生風雲而對漢王椎鈍之性
與夫蜀人糾合之軍內外隔絕主將紛紜不翅田犬之

搏兔鷲鳥之撮蚊然而大蛇之分為二東井之聚者
五數極亂世歷歸真主以鴻門之會項莊之舞尚不
能得之肘腋又安可徵之于軍旅俄而大風北來登
屋拔樹揚塵蔽空走礫如雨白晝窈冥漢王遁去則
夫漢之不可勝也蓋可睹矣至于滎陽之擊四面廣
武之中吾指未嘗不拔自幾殆脫于垂死且項王之
蓋一世其氣不為不盛而扛九鼎其力不為不多及
夫冬會垓下夜聞楚歌騅也不逝虞兮奈何豈非天

之所興不可得而廢天之所利不可得而害故羽終于自剄亦自知天亡之而非戰之罪也吾嘗緩策乎陰陵之戰稅駕乎長安之都弔遺靈于寂寞慨舊迹之荒蕪以為彼慄悍猾賊者固已亡矣而寬仁愛人者又安在乎乃知起者必至于滅有者終歸于無此古人之所以致論蝸角而輕視軒冕吾與夫莊生之徒

次韻常父二十九日開上作

泊舟不厭城南淺談笑淹留驚晷短為傳潮信艤江干
暫移已覺如天遠足音來此憫寂寞酒面自紅爐自煖
預愁會合有睽離人事猶如月虧滿何如便賦歸去來
百尺高帆席同卷

招常父承君舟中觀雪

泊舟亭下水隅岸有脩竹晨起雪紛紛開簾見群玉請
來同此景一醉杯中綠

發儀真寄常父兄

金人四八二
卷三十一
卯角同出處中路稍差池往事如一夢新年生白髭小
官仍齟齬異國更羈縲長時恨隔濶既見少開眉朝共
壚邊飲暮同窓下棋一日復一日春春不忍離今茲解
舟去豈為赴同期久住恐相溷蕭然生事微欲將眼中
淚一灑別時衣諸緒正牢落勿令心重悲融怡和笑語
愴怳迷東西甘言戒婢子循髮祝阿宜憤憤情懷惡正
同中酒時晚泊蘆荻岸江天雲四垂高城已不見春雨
更如絲

二十二日大雪發長蘆

張帆風尚小出口勢愈急扁舟已中流前後無所及側
看岸旋轉白浪若山岌礫砢時有聲百罇水爭入危檣
聽欲折柁柄脫操執我有常病妻素羸多不粒及茲益
憤亂卧喘氣吸吸婢姥半北人茲險未嘗習蒼皇面深
墨嘔噦皆膽汁可憐兒女輩往往相聚泣出門強指揮
飛沫濺衣濕江豚踊吾前獮獺作人立意如鷲吾噦出
沒相百十呼神擲楮泉祈佛啓經襲是時正月尾於節

甫驚蟄雲氣作冥晦氣候變寒澁日中僅得止性命危
若拾紛然方寸亂魂幹久不集官期幸未迫安用苦汲
汲官兵勇貪程一震當少歲何如彼居民生不出井邑
吾田雖曠瘠飢粥粗可給勞生嘿自慨茅舍行且葺

讀江淹集

煌煌一疋錦爛爛五色筆始從何處得悵此夢中失淹
也雖善文歲蕤少筋骨譬人氣不深往往多奄忽晚年
既富貴外學仍老佛豈非有所怠寢使天才屈奈何不

自尤秘怪疑鬼物我有十丈舟風期駕溟渤寒霞謁東
皇擘浪窺月窟唯憂倦或止視此頗自栗

馬當夾阻風

萬田荻野無人煙我來日暮雙繫船半夜星斗垂欄干
銀河倒影搖清川人言神物當會合鍊纜纏繞安如山
五更洶洶有聲至車騎蹴踏乾坤翻怒雷殷殷雨隨下
黑風三日不見天此中道路多險惡正在馬當小孤之
兩間三江五湖所鍾聚直下無底旁無邊掀騰擺觸作

意氣更無拘束隨所便巨礮突若虎頭出黃沙莽作車
輪旋端居不動尚股栗誰敢身試蛟龍淵自吾汎洛涉
淮泗間關淫滯今半年廬山蒼翠已在目毋用急進干
憂患不如宿留會澄霽淹速有數非偶然芻中酒熟聊
一醉春夢酣酣牽晝眠

初夏

初夏新雨餘蕭然風轉北芭蕉索索鳴庭戶有秋色清
寒思挾纒向暑袵絺綌陰陽孰主張變態只頃刻幽軒

暮支頤佳趣生靜默雲氣薄南山坐令蒼翠隔

喜雨

低田有水高田乾南風日日吹塵土新秧已生未種得
此時却得彌天雨連山蔽空望不極溢徑盈庭勢漂瀉
從今歲事當有成飽喫香秔胡可數老來涉世心益懶
只欲榷遲守環堵若令積穀支歲年便可終焉事農圃

鑄錢行

三更趨役抵昏休寒呻暑吟神鬼愁從來鼓鑄知多少

銅沙疊就城南道錢成水運入京師朝輸暮給若不支
海內如今半為盜農持斗粟却空歸

呈范清老

范子愛高卧家政付兒孫將身比瞑目達理吾所尊前
日過所居蔓草深閉門范子欠伸起性寡笑與言相與
尋幽寺復將坐前軒斜陽滿庭下不厭烏雀喧擘雲青
山秀經雨野水渾念此景清曠非君誰與論少年一傾
蓋白首義彌敦頽然各忘返明月照黃昏

曹亭三絕句

外看江水長裏見荷花發
廬阜收白雲南浦浸明月
漾舟荷花裏艤棹綠楊陰
却上曹亭望山高江水深
登臨常患遠游覽不能繼
此景對門墻篋輿日三四

夜入監中

欹枕汗如洗出門更已深
長風萬里至河漢清人心
芙蓉有佳氣楊柳搖疎陰
秋聲繁促織月色動棲禽
落魄衣忘帶逍遙髮懶簪
聽從涼冷入一快直千金

七月六日作

隔江見雨來尤苦風大疾蓬蓬宇宙中掀攪若無物百川水倒流瓦石亦飛越濃雲最輕浮暫聚非永結隨吹東西揚散漫頗倉卒竟無點滴惠初勢不可遏正昏露青天方噎見白日但增塵土高益使水泉竭農夫憂歲事悵望眼流血蛟龍不能神卷尾藏窟穴空餘烏雀噪庭戶晚更熱深夜氣稍蘇林端挂明月

暇日至家園

仕宦吾已知退休不如早九江園地勝萬个竹色好每
到必裴回翛然寄懷抱于此築亭臺於彼植花草傍嶺
更栽松引池將溉稻經營各有處何日室遂考薄田方
待歲一雨洗枯槁指穀以易泉橐囊助傾倒茅茨若粗
完世路迹可埽南山多白雲臨望娛我老

城東作

九江非吾土久寓忘羈棲丘墳之所宅舍此亦安歸錢
官最閒暇因得治其私松楸鬱在望時復至郊圻駕言

上東原藹藹晨露晞草木新過雨秀色可療飢念此道
旁民散居在山蹊新秋百物熟入城各有携芋迸紫卵
壯薑抽紅笋肥樵香憶烹鯉稻白想流匙養生無不有
美味仍及時此土遂可老行當結茅茨雲水有深約塵
埃無盡期人生適意耳富貴亦何為

月夜

平生最好月况此秋夜閑長風送蕩漾浩露洗團團仰
頭視虛空光采如可餐星辰斂芒角河漢收波瀾更無

微雲翳挂此白玉盤六合靜皎皎萬木涼珊珊為爾廢
昏卧裴回更漏殘更登高處望歷歷見湖山爽氣集冰
雪清心生羽翰便欲御冷然因之游廣寒一臨天池水
沐浴隨飛仙

送鄭君玉

西風黃葉下送子以秋色彭蠡一歸舟關山遠行客民
思似秤平郡戴如弦直交游亦難值出語皆肝膈

出城一首

驅馬出北門秋色滿平皋
泄雲弄微陰寒日照我袍
遵途升復降控縱亦已勞
落松被徑軟青蒿倚崖高
南顧臨大江厲風蔚波濤
蛟龍正崛起強舟楫未易操
亦有沂洄人揚帆氣方豪
覆舟諒由險豈曰命所遭

九日獨登曹亭

重陽不見菊節物愈凋零
性復不嗜飲對酒只如醒
秋堂靜便卧既起思殊清
登高未免俗亦不造林
垆屋西連郡郭木末乃曹亭
杖藜只獨往坐對南山青
蕭瑟西

風高決滘滯雨晴斷雲見天色殘潦知地形遙峯落照
斂別浦暝煙生歸鳥向村急孤舟當渡橫此時有佳興
乃惡聞人聲况令預尊俎而使聽箏笙嗟吾趣尚僻取
笑世上英豈宜濫簪紱但可老柴荆

寄常父

愁霏久不霽翳此白日光陰風薄庭柯落葉墮我旁蕭
條秋氣高百感攪中腸側觀南飛雁肅肅尚有行念昔
來此土弟第各康彊二季皆驚驚梧桐殞朝陽踟躕故

所游墟墓草已荒會合須臾期去日一何長吾兄近此
別咫尺非異方官守畏簡書羈絆不得驤如星限河漢
東西但相望江魚肥可薦庭菊粲以芳崢嶸時節晚誰
與共一觴伯氏副邊城苦寒天早霜石火雖云煖不如
還故鄉群飛隘霄極弱羽因飄揚祿薄未足飽胡為久皇
皇古人有三高彼豈悅膏粱願言同斯志畢景事耕桑

九月二十九夜作

江城月黑風雨寒四無人聲夜向闌有鳥九頭天外過

嚶嚶軋軋鳴悲酸吹燈滅燭小兒怖犬呼其隣嗥且怒
天明日出百怪消長空蹤跡無尋處

堂前見笑樹

堂前見笑樹落葉已如積籬上牽牛花青青照秋色四
序都幾何推遷半陳迹晝短夜益長晴薄陰易得浮雲
忽以興慘慘風自北便有扶續心人誰顧締綌飢蚊爾
何為乃欲長肉食翼翅不能舉自此且衰息

朱君以建昌霜橘見寄報以蛤蜊

贈我以海昏清霜之橘報君以淮南紫脣之蛤橘膚軟
美中更甜蛤體堅頑口長合開花結子幸採摘沒水藏
泥豈蘄得二物同時有不同賦形與性由天公請君下
筋聊一飽莫索珠璣向此中

冬日久雨有懷保德

陽洩已氤氳陰疎不凝結可憐終日雨總是連天雪雖
貧布衣煖尚欲應時節坐想大河東苦寒山石裂

小庵詩

甃石為道旁植冬青不死之靈草跨水為橋上有百年
老木之清陰小庵又在北墻北花竹重重更深更深公餘
竟日無一事卜此佳趣聊棲心明月為我遲遲不肯去
清風為我淅淅生好音閒然宴坐如澗谷樂以真樂非
絲金君看此庵亦何有架竹編茅容側肘人生自足乃
有餘不羨簷牙切星斗朝攜一筇杖暮炷一爐香悠然
每獨笑物我兩皆忘

元豐三年十一月施君發之縣丞艤舟潯陽出所

收書相示好之篤蓄之多裝裱之妙可尚也詩
以記其事

發之之舟繫溢水示我名書百餘紙自言此乃十之一
訪尋藏蓄尚未已裝褫卷襲皆精緻從前所見無此比
城荒俗陋誰與游如君好事固可喜天寒手冷不厭觀
似我賞音知有幾自今有得當助君不憚緘封寄千里
夜坐菴前

人定鳥栖息菴前聊倚欄裴回明月上正在脩篁端清

影水玉碎疎音環佩寒
脩然耳目靜覺此宇宙寬
人生甘物役汨沒紅塵間
宴坐得俄頃境幽心已閒
諒能長無事自可駐朱顏
所以學道人類多隱深山

杜令無隱亭賞梅

梅生要孤高故在城顛上
臘過已多時花寒猶未放
正前乃廬山積雪千萬丈
開樽望崢嶸酒面已遲上
直須玉蘂十分開洗盡烟嵐
春氣回請君掃地更招客
為君對花卷大白

晚興

春雪弄微陰晚色連細雨
見角芽已長瑞香花欲吐
雖寒亦料峭稍霽即和煦
園林擬杖策芳物行可數

上元作

春來霧雨久不收上元三日
如秋傾城娛樂競沽酒
舊歲豐登仍足油樓前燈山
燒荻火光影動搖桑落州
太守憑高列歌吹游人烘笑
觀俳優銅盤貯棊插烏帽
從兵小史斥下樓侍觴行食
甘官妓目眙不言語或偷

短長赤白皆莫校但取一笑餘何求譬如飲酒且為樂
不問甘苦醉即休歸來統如打五鼓春寒慘慘吹駝裘
群兒嬉戲尚未寢更看紫姑花滿頭

送張天覺

車上不須僂途窮不須泣萬事儻忽如疾風莫以乘車
輕戴笠愛君清如玉立愛君直朱弦急膽肝磊落貯
星斗意氣軒騰脫羈紲聖明天子聚羣材下至椽杙
猶收拾况君屢薄青雲飛暫爾低回豈長墊我亦區區

有心者海水期君更注挹蕭蕭江路澁烟濛客帆濕惜
君又作千里行欲別還留手重執

出城至太平將見熊伯通

兩松闢為門前見青山橫坡陀若相接宛轉疑有情日
出鳥呼樂春歸林翠明問我何所往行當造殊庭紫微
有仙客住在泉石清咫尺久不覲渺如隔蓬瀛今將往
見之先已耳目醒願聞直截義庶使正覺成紛紛焉足
道無使一塵生

詩贈王從善

廣庭試群材俊筆馳短晷鎖廳爭第一乃後二三子騎
龍失頭角十載困泥滓泛舟自淮南得邑窮楚尾江上
始相逢清名久吾耳油然睹顏色悅澤已可喜博學有
淵源高談見根柢有如萬斛鍾久叩聲益起如君豈易
得蹭蹬乃在此棧樸析為薪奈何遺杞梓我本世畸人
僂焉頑似鄙一官傍松楸自足勝朱紫功名已灰心藜
藿思沒齒欲結方外遊徜徉訪雲水聞君亦有意不戀

五斗米笑指廬山高論交從此始

春暄大旱率爾援筆

去歲有閏既苦寒今年春早亦大暄清明寒食在二月
禁火正如揮箆天桃花零落牡丹發漠漠江頭吹柳綿
細蟲打窓夜如雨潤氣蒸礎朝生泉卷簾闥向迎風坐
徹褥去屏思罩眠勸君用心慎倉卒萬事轉易如車旋
安知明日不凜冽莫以炎涼隨目前

送謝仲規致仕

公年五十餘鬚鬢黑如漆朝廷方進用未是挂冠日又
非力不任數以身自乞人疑徇虛名今也踐其實蕭然
巢許姿臭腐視冕紱東南富人材卿相近間出急流能
勇退千古未有一賢哉謝夫子趣尚真不屈騰裝嶺外
遠歸棹江邊疾故鄉何日到清暑坐華室荔包雜紅紫
茶品分甲乙歲時會親賓左右列圖帙回頭烟瘴地揮
手風波蜜天將勞以生乃獨取閒佚觀公眉宇秀凜凜
有道骨當為地上仙不是籠中物我亦素有心賤貧嗟

汨沒鴻鵠羽翼成高飛脫羅罽鷦鷯未有巢側目空自
失短章健公決行且營蓬蓽

曹亭獨登

問我當何之曹亭蒼木外江湖水方漲曠濶吾所愛微
風撼晚色爽氣回秋籟楊柳隱官堤芙蓉接公廨白雲
依山起點綴若圖繪何須招客游清興自無輩落日更
憑欄下看飛鳥背

晨出郡南

日未出山更青湖既濶風自生垂楊弄疎影啼鳥曳殘
聲江城晚色懷抱糞况在白龍堤上行

夏旱

元豐四年夏六月旱風揚塵日流血高田已白低田乾
陂池行車井泉竭多稼如雲欲成就天胡不仁恣斷絕
雷聲隆隆電搖幟雨竟無成空混熱如聞大河決北方
目極千里波濤黃我願蛟龍卷此水洒落東南救焦死
又聞戎瀘方用兵戰車甲馬穿雲行安得疏江擁三峽

餘波未流灌百城分支引派入南畝盡使枯槁得復生
志大心勞竟何補仰視雲漢高溟溟吾徒祿食固可飽
更願眼前無餓莩

澆瑞香

潑潑瑞香花載水朝復暮瑞香得膏滋枝葉乃如故明
春花必好喜此夏秋度大田塵土深嘉穀可織屨泉源
不供飲何力更灌注嗟吾惠已屯局向東庭戶

西堂

我置一榻在西堂南風北風俱得涼
軒窗開闔無壅塞
枕簟照映生輝光前有秋花鬧如錦
乘時吐秀爭煌煌
堂前堂後種植滿坦腹轉側各相望
初開半落皆有意
牽動幽興何其長
彌天好夢誰喚覺
林間鳥舌弄絲簧
賤官固冗亦偷暇
一室甚卑堪退藏
吾心與世久契濶
萬事本無非故忘

聞砧作

見蠶成繭能幾日
繒帛輸官千萬足
丁丁砧杵相和鳴

半夜霜風入秋律一年寒事從今始四序流光如羽疾
昨朝尚喜迎涼坐閉戶暮窻嫌不密人生天地隨氣轉
此身猶復非吾物癡兒于世孰自量欲與造化爭飄忽
功名富貴固有時進退屈信何可必飽羹菽飯幸粗飽
何用操瓢向人乞

登齊雲樓

登彼齊雲樓下視江州城城前俯大江流水與天平人
煙疎復密漁舟縱復橫其下各有人人各有所營意氣

充宇宙機巧鬪生獰蠢然大塊中何異蟻蝨蝇天地一
何廣人物一何微蠻氏與觸氏紛爭誰是非就令有所
得究竟欲何為所以達觀人事事棄置之登彼齊雲樓
覽世良可悲不如飲美酒浩歌醉言歸

待月

初宵待月先掃門雖未出海光照垣皎然輝未更無壅
比之常夕尤清妍星辰不復爭芒角河漢自合收波瀾
久之黥黥若蒙垢全起四隅陰氣繁人心賞翫

原闕

詠橘

古人詠橘誇甘香獨我愛此千樹黃
燭龍銜珠出扶桑
圓芑簇簇浮朝霜誰家金餅籬內挂
一夜火圍林際光
折來便好命佳客玉壺況有榴花漿

別友人

江城春風落梅花我適南州君在家
離筵勸我一盃酒
送我萬里天之涯少年曾同竹馬戲
漸長聚散良可嗟

後時迎笑復何地寂寞無言雙淚斜

遺介之蕉

長不過三尺堅如大古鐵身雖糞土賤名在佳果列中
心唯養恬外貌頗多節憑君暫收採彼此無摧折

疾中偶成呈介之

吾生十五猶童孩胸中膽氣摩天開自憐少年輒有老
夫志恐是天仙犯帝怒謫在下世馳驅乎塵埃壯志若
鐵石頑直未易摧奈何諸侯不薦賢天子不聞才空使

丈夫兒藏頭縮角埋蒿萊天不管地不顧此理得不鳴
呼哉今朝大飲致沉疾朋友戢迹絕往來使人孤眠址
窻下風雨蕭蕭良可哀冷笑今之世人少信義旦暮之
間輒變喜愛成嫌猜介之不恤我扶力吟詠據幽懷

城樓晚望

城樓高跨天中央登臨舉目極四荒蒼雲彤霞物象變
落日清風天氣涼樹深蒙密幽鳥語山勢蟬聯煙靄長
溪流滄滄東下去安得扁舟還故鄉

西施

邀出苧羅山送上姑蘇臺果迷吾主意都忘越兵來

自警

大材耻銜耀深智甘蒙晦所以德業新闇然光日大一
時師教誼百世仰風裁豈比迷識人恃能多自懷

辯言

兩葉可掩目兩豆可塞耳小人多奸邪君子防近蔽周
公未免謗孔子亦遭毀人言不足信自古均如此

自重

千金人所重一物人所輕君子欲自尊接物以至誠行
誼金石固笑語蕭韻聲群居自聳畏暴慢何由形

述鷗

水濱老父忘機關醉眠古石紅葉間綠波蕩漾意不動
白雲往來心與閒有鷗素熟翁如此命侶呼倚就翁喜
相親飲啄少畏避自浮自沉不驚起漁人窺之即謀取
手攜羅罔來翁所群鷗瞥見皆遠逝千里翩翩一回顧

鷗不薄翁翁勿疑避禍未萌真見機
漁人羅罔不在側敢辭旦夕從翁嬉

夏夜

更漏沉沉人響絕唯有松風韻清切
是非榮辱不相關獨卧南軒半牀月

戲書勸人飲酒

金烏翩翩玉兔馳流光上下矢發機
人生于其間都無百歲期樂府舊傳
金縷衣勸言須惜少年時我今為君

一歌之酒行到君君莫辭朱顏綠髮不行樂白頭面皺
將何為晉時八達唐李白以飲馳名君所知何須自苦
億方得為英竒榮華有分難力取可笑蘇秦空引錐

李太白

卓哉太白詩家徒天然俊逸不可拘豪文脫去刻削巧
遠意得自渾沌初酒醒落筆洒風雨當時所就皆須臾
駢駒馳驟日十里鴻鵠軒騰凌九虛蹇驢尺鷃不足道
徐步低翫何區區後人吟咏多自蔽搜句鍊字為良圖

撞金拊石皆可聽未若霹靂轟天衢公之大材不小到
俗議何者相加誣賤生仰公風格美未能髣髴空躊躇
凡馬亦同學

凡馬慕騏驎努力思遠行置之跛驢中咫尺遂自矜學
者所慮遠欲並揚鸞鳴豈以勝時俗驟爾意氣盈聾聵
固易欺奈有聰與明作詩戒羣居吾言非汝輕

海南碧琉璃餅

手持蒼翠玉終日看無足秋天長在眼春水忽盈掬瑩

然無埃塵可以清心曲有酒自此傾金樽莫相責

諭志

匣中有神劍夜夜鳴不休欲汙四夷血思僂佞臣頭不
願就軒馬賤用良自羞深韜度歲月怨氣射斗牛仗君
遠提攜可以安九州莫作鉛刀顧此非繞指柔

乞巧

衆人喜乞巧我以巧為憂言巧多欺佞行巧為邪柔學
巧競穿穴文巧多彫鏤巧不令如此宜吾之恥求我欲

守拙性浩然鎮輕浮盡室衆巧門化以孔與周此志尚
未遂感激在初秋南顧問牛女女實能巧不

十日菊

昨日酒中花今日籬下草馨香尚未改棄置一何早怨
泣露華濕世情安可保

晦之詩尤瘡鬼甚意鬼不能為端士害奉酬作詩
吾聞烈士仗忠信出入鬼神皆避逃維彼小人鬼所狎
崇異皆自不善招晦之履行並仁義常揭名教為已操

天將大任預連蹇薄宦南州初折腰的勞戴星出視事
冒突瘴霧匪一朝浸淫不制偶成疾愁卧漳浦擁敝袍
有時體燥似灼火憤怒索筆為長謠句中有意譴瘧鬼
詞氣凌鑠吏部高予竊料君所守正彼鬼何者能為妖
幽明路異不相忤有疾自是疎攝調強飯進藥姑自愛
勿惑異說心空搖菊花未落遲君出猶可共醉樽中醪

送王秀才歸邵州

去家逾年客千里秋風一夜歸心起平明騎馬出郊關

北望邵陵程尚幾道旁送者皆知已相顧慘悽將挽止
丈夫壯心自有圖暫別何須淚如水

席上勸王八飲

細雨蕭蕭風淅淅凍雲倚天如掃墨高堂置酒送行人
金杯緩飲愁腸滌勸君莫惜暫酩酊自今一別遂南址
後時月夕與花朝縱飲共醉安可得

冬夕翫月

夜深烏宿人語靜中庭獨坐饒清興霜天高潔無片雲

海月澄明挂孤鏡
飛光照物毫杪露
冷氣逼人肌骨冰
苦吟未盡愁曉侵
北向時時看斗柄

冬夜

冬夜一何永
幽房寂無侶
青燈弄微風
敗葉鳴疎雨
淒涼角聲動
悲散穿雲去
展轉卧書帷
惟羈愁欲誰語

封川上元

穿城不千步
十步然一燈
閃閃搖斜風
熒熒若疎星
士女魚鳥聚
鼓吹鼉鼙聲
蠻俗自為樂
我心愁不醒

瑞蓮

花開自有婵娟伴
牽人情緒迷人眼
寂寞雙紅不動時
皇英對立湘江晚
芳心向背如相結
媚臉高低開已半
欲隨蛟蝶採清香
堪恨綠池風浪煖

江上獨步

晚步碧江上
掀衣忽回顧
安得一葉舟
飄然五湖去
浩歌風水古
醉倒煙霞暮
誰能逐羣動
役役趨世務

寓目

白日照園林悲風久蕭索橫秋隻鵲健駕海孤帆逸陰
雲帶雨歸晴嶂排空出一望一高歌憑誰縱吟筆

有感


驚風拔古松浮雲掩秋月對景輒悲歌隨聲入清血

題清溪圖

清溪之水清無泥鳧飛鴈下太平池昔人嘗比翠綃舞
安得卷之必自隨畫師摹寫多巧思只用烏田數張帝
戲拈秃筆掃成圖濃淡遭迴真得意江磯釣浦遠更深

昔時行處皆可尋張公好雅心不俗眉山先生為楚吟
公今奉使庾嶺南峽中喬林與天參白雲搖曳入船戶
清江呼嘯窺江潭天靈不開地多熱佛桑山丹赤如血
此時一展清溪圖洒若胸中貯冰雪南方不可以久留
祝公歸來此中州枕白石兮漱清流蘆聲戰雨曷若颺
風之拔木漁煙凝晚曷若海霧之橫秋我已卜居在九
江九華廬阜鬱相望千里思公如咫尺扁舟棹月到池

陽



清江三孔集卷二十二